

Inuussutissarsiutinut pikkorissartitsisarnernut tapiissutit pillugit Namminersornerullutik Oqartussat nalunaarutaat

Inatsisarsut inatsisaanni nr. 2, 31. maj 1999-meersumi § 49 aamma § 52, imm. 2 naapertorlugit, Inuussutissarsiutinut ilinniartitaanerit inuussutissarsiutinullu pikkorissartitsisarnernit pillugit Inatsisartut peqqussutaanni, kingullermik allangortinneqartoq Inatsisartut peqqussutaat nr. 1, 16. maj 2008-imeersoq naapertorlugu, aalajangersarneqarpoq:

Atuuffia

§ 1. Matumani nalunaarut inuussutissarsiutinut pikkorissartitsisarnernut tapiissutit suliamik ilinniagaqarsimasunut ilinniagaqarsimanngitsunullu, ilanngullugit suliffissaaleqisut, sammitinneqartut inatsisitigit aalajangersarneqarput, taamaattorli tak. § 4, imm. 1 aamma 2.

Imm. 2. Matumani nalunaarut malillugu tapiissutit lærlinginut ilinniagaqartunulluunniit allanut tunniunneqarneq ajorput. Taamaattorli Piareersarfinni ilinniagaqarnermut atatillugu tapiissuteqartoqarsinnaavoq.

Pikkorissartitsisarnernit

§ 2. Inatsisartut aningaasaqarnermut inatsisaanni aningaasaliissutigineqartut malillugit tapiissutit tunniunneqartarput inuussutissarsiutinut pikkorissartitsisarnernut ilinniagaqaqqinnermilu pikkorissartitsisarnernut atatillugu angalanernut najugaqarnernullu aningaasartuutininut, taakku siunertarissammassuk pikkorissartut suliffeqarnermi pisariaqartitsinerit malillugit piginnaasaqarfigillikkaminnik piginnaanerulerlutillu ineriartortitsinissaat.

Imm. 2. Taamatuttaaq suliffissaaleqisunut ilinniagaqartunulluunniit Piareersarfinnut attuumassuteqartunut inuutissartissarsiutillu iluanni ingerlariaqqiffiusumik, annerpaamik, sivikinnerusumik ilinniagaqartunut pikkorissarneqarnerannut atatillugu angalanernut najugaqarnernullu aningaasartuutininut tapiissuteqartoqarsinnaavoq, taakku siunertarippassuk pikkorissartut inuttut ineriartornerannik siuarsaanissaq, taamatullu Inuussutissarsiutinut Ilinniartitaanerimut Naalakkersuisoqarfup nalilerpagu pikkorissartitsineri taamaattuni peqataanissaq aalajangiisuussasoq suliatigit piginnaanngorsaqaqqinnermik ingerlatsiviusariaqartoq. Pikkorissartitsinerilli taamaattut pingaarnertut maleruagassarissavaat ingerlanneqartassagamik Piareersarfinni ataasiakkaani inunnut pineqartunut iliuusissatut pinngitsoorani pilersaarussiaasartussat tunngavigalugit, takuuk suliffissanik

innersuussisarneq il.il. pillugit Inatsisartut peqqussutaat, imaluunniit piginnaasaqarfigiligassanut malitseqarfusunik pikkorissartitsisarnerit ilaannut ilaappata.

§ 3. Aningaasanut inatsimmi aningaasaliissutaasut iluanni tapiissutit inuussutissarsiutitut siuarsaaffujumasunut piginnaasaqarfigiligassanik ineriartortitsinermut pikkorissartitsinernut atatillugu angalanernut najugaqarnernullu aningaasartuutitut tunniunneqarsinnaapput. Taakku saniatigut pikkorissartitsinernut taamaattunut pikkorissarnermut akitsuutitut pikkorissarnerisutinuullu tamakkiisumik ilaannakortumilluunniit tapiissuteqartoqarsinnaavoq. Pikkorissartitsinerit ingerlanneqassapput Inuussutissarsiutitut Ilinniartitaanermut Naalakkersuisoqarfik, suliffeqarfiit aamma kommunit suleqatigalugit.

§ 4. Taamatuttaaq Inuussutissarsiutitut Ilinniartitaanermut Naalakkersuisoqarfik qullersanut inuussutissarsiutitini ingerlariaqqiffusumik, annerpaamik, sivikinnerusumik malitseqartinneqartunik tunngaviusumik pikkorissartitsisarnernut tapiissuteqarsinnaavoq.

Imm. 2. Imm. 1 aamma §§ 2-3 malillugit pikkorissartitsisarnernut taaneqartunut pikkorissaasunut ullormusianut, angalanernut najugaqarnernullu aningaasartuutitut tapiissuteqartoqarsinnaavoq. Pineqartunut qinnuteqaatit pikkorissartitsisussamut tunniunneqassapput.

§ 5. Inuussutissarsiutitut Ilinniartitaanermut Naalakkersuisoqarfik tapiissutinik tunniussisarnermut atatillugu Inuussutissarsiornermut Piginnaangorsaanermullu Siunnersuisoqatigiinnit inassuteqaatinik ukiumoortumik pissarsisassaaq.

Tapiissutinik tunniussisarnermut najoqqutassat

§ 6. Tapiissuteqarfiginissamik qinnuteqaat sulisitsisumit, kommunalbestyrelsimit, tak. § 2, imm. 2, imaluunniit pikkorissaasussamit, tak. § 4, imm. 2, Inuussutissarsiutitut Ilinniartitaanermut Naalakkersuisoqarfimmut imaluunniit suliaqarfusumut qitiusumik ilinniarfimmut inuussutissarsiutinulluunniit ilinniarfimmut tunniunneqareersimassaaq pikkorissartitsinissaq sioqqullugu ullut 14-it tikitsinnagit, tamatumani qinnuteqarnermut immersuiffiliaq atorlugu, imaqassallunilu pikkorissartitsinissap siunertaanik, imarisassaanik, sivisussusissaanik, pikkorissarfusussap sumiinnissaanik, peqataasussat amerlassusissaannik, angalanernut najugaqarnernullu aningaasartuutit pillugit aammalu allatigut tapiissuteqartoqarsimasinnaaneramik pikkorissartitsinissamut tapiissuteqartussap aningaasaliissuteqarfusimasinnaasaanik nassuiaateqarfusumik.

Imm. 2. Pikkorissartitsinernut ilinniagaqaqqinnermullu pikkorissartitsinernut atatillugu aatsaat tapiissuteqartoqarsinnaavoq pikkorissartitsinissaq pineqartoq sioqqullugu qinnuteqareernikkut tapiiffiqeqarnissamik akuersissuteqartoqareersimappat. Tapiissutit sulisitsisumut imaluunniit pineqartumut aningaasartuutissanik isumaginnittumut tunniunneqassapput.

§ 7. Pikkorissartitsinernut ilinniagaqaqqinnermullu pikkorissartitsinernut sivikinnerpaamik ullunik sisamanik sivisussuteqartinneqartunut tapiissuteqartoqarsinnaavoq, pineqarsinnaallunili pikkorissartitsineq aqqissuunneqarpat pikkorissartussat pikkorissarnissaq sioqqullugu pikkorissareernerulluunniit kingorna suliassaqartinneqarpat.

Imm. 2. Imm. 1 naapertorlugu aalajangersagaqaraluartoq Inuussutissarsiutinut Ilinniartitaanermit Naalakkersuisoqarfik pikkorissartitsinissanut ullunit sisamanit sivikinnerusussanut atatillugu tapiissuteqarsinnaavoq pikkorissartitsinerit pineqartut suliaqarfinnut teknologiitigut imaluunniit ilisimatusarnikkut imaluunniit ilinniartitaanikkut malitseqarfusutigut siunnerfeqartussaappata, ilanngullugit suliamik ilinniagaqarsimasunut ilinniagaqarsimanngitsunullu qullersatut tunngaviusumik pikkorissartitsinerit.

§ 8. Pikkorissatitsinernut qitiusumik ilinniarfinit imaluunniit inuussutissarsiutinut ilinniarfinit neqeroorutigineqartunut ikinnerpaamillu arfinilinnik peqataaffigineqartussanut atatillugu taamaallaat tapiissuteqartoqarsinnaavoq, tamaattorli tak. imm. 2 aamma 3.

Imm. 2. Imm. 1 naapertorlugu aalajangersagaqaraluartoq pikkorissartitsinernut qitiusumik ilinniarfiit imaluunniit inuussutissartitut ilinniarfiit imaluunniit allat pikkorissartitsinissaat suleqatigalugit aaqqissuunneqartunut tapiissuteqartoqarsinnaavoq, assersuutigalugu ilinniartitaanermit malitseqartinneqartut aaqqissuussanut Inuussutissarsiutinullu Ilinniartitaanermit Naalakkersuisoqarfup suliaqarfusooq pillugu ataatsimiititaliamit inassuteqaatisiaa tunngavigalugu akuersereerneratigut.

Imm. 3. Imm. 1 naapertorlugu aalajangersagaqaraluartoq Inuussutissarsiutinut Ilinniartitaanermit Naalakkersuisoqarfik pikkorissartitsinernut najukkani Piereersarfinit allanilluunniit neqeroorutigineqartunut atatillugu tapiissuteqarsinnaavoq pikkorissartitsinerit pineqartut assigisinnaasaat Nunatsinni qitiusumik ilinniarfinit imaluunniit inuussutissarsiutinut ilinniarfinit neqeroorutigineqarsinnaanngippata. Inuussutissarsiutinut Ilinniartitaanermit Naalakkersuisoqarfik pineqartunut akuersinissaminut atatillugu isumannaassavaa pikkorissartitsinerit suliatigut pissarsiviusinnaanissaat aammalu pisariaqanngitsumik aningaasartuuteqarfigineqarnissaa.

§ 9. Angalanernut aningaasartuutinut matussusiinissamut tapiissuteqarsinnaanissamut piumasaqaataavoq pikkorissarfusussamut utimullu angalanerit pikkorissarnissamut atatinneqarnissaat. Pikkorissaqataasoq piffissami allami angalappat pineqatumut angalanissaanut aningaasartuutinut matussusiinissamut tapiissuteqartoqarsinnaanngilaq.

Imm. 2. Angalanernut najugaqarnernullu aningaasartuutinik matussusiinissamut tapiissuteqarsinnaanermit piumasaqaataavoq angalanerit pikkorissarnerillu aaqqissuunneqarsimanissaat aningaasartuutigisassat sapinngisamik annikinnerpaatinniarlugit.

§ 10. Pikkorissartut 18-inik ukioqalereersimasuussapput, annerpaamillu, inuussutissarsiutinut ingerlariaqqiffiusumik sivikinnerusumik ilinniagaqarsimassallutik, Nunatsinni najugaqartuussallutik pikkorissartitsinissamullu pineqartumut peqataanissamut suliatigut tunngavissaritinneqartunik atasumik naammassinnissinnaassallutik.

§ 11. Pikkorissartitsinernut ilinniagaqaaqqinnissamullu pikkorissartitsinernut pineqartunut angalanissanut najugaqarnissanullu aningaasartuutinik matussusiinissamik siunertaqartumik aningaasatigut allatigut tapiissuteqartoqarsinnaasimappat una malillugu tapiissutissarsisoqarsinnaanngilaq.

§ 12. Inuussutissarsiutinut Ilinniartitaanermut Naalakkersuisoqarfik tapiissutinik aqutsinermut atugassanik immersuiffliassanik nalunaarusiorfinnik suliaqassaaq.

Imm. 2. Tapiissutinik pissarsisup immersuiffiliaq nalunaarusiorfik immersoreerlugu Inuussutissarsiutinut Ilinniartitaanermut Naalakkersuisoqarfimmut pikkorissartitsisimanerit pineqartut naammasseriiginnartut piaarnerpaamik nassiutissavaa.

Tapiissutit annertussusiat

§ 13. Taamaallaat tapiissuteqartoqartarpoq Inuussutissarsiutinut Ilinniartitaanermut Naalakkersuisoqarfup akit aalajangersarsimasai naapertorlugit pikkorissarfusussamut pikkorissarfusumullu angalanernut najugaqarnermullu aningaasartuutissanut, taamaattorli tak. § 3 aamma § 4, imm. imm. 2.

Imm. 2. Pikkorissartitsiviusussami pikkorissartitsiviusumiit ullormit siullermiit ulloq kingulleq ilanngullugu pikkorissartitsiviusumut najugaqarnissamut nerisaqartinneqarnissamullu aningaasartuutinik matussusiinissamut, soorluttaaqq pikkorissarfusussamut tassangaanniillu angalanermi akunninnermi najugaqarnermut nerisaqartinneqarnermullu aningaasartuutit matussuserneqassapput. Najugaqartinneqarnermut aningaasartuutinut pineqarput inissiaqartinneqarallarnermut sumiiffigisami naapertuuttunut aningaasartuutit atuuttut. Nerisaqartinneqarnermut aningaasartuutinut atasumik pineqarput Nunatsinni Nunatsinniillu suliamut atatillugu angalanermi ullormusiat unnuarsiornermullu tapisiat pillugit maleruagassat. Pikkorissartitsinermi nerisaqartinneqarneq najugaqarfissaqartinneqarnerlu ilaatinneqanngippata nerisassarsiutissat unnuarsiornermilu tapisiat naalagaaffimmi, Namminersorerullutik Oqartussani kommuninilu atorfillit pillugit maleruagassat atuuttut naapertorlugit matussuserneqassapput, ilanngaatilugit ullaakkorsiutissanut atugassat, taakku akunnittarfimmiinnermi ilaatinneqareerpata, taamatullu akeqanngitsumik nerisaqartinneqarnissamut ajunngitsorsiassanit ilanngaatigineqartussatut.

Utertitsilluni akiliineq il.il.

§ 14. Inuussutissarsiutinut Ilinniartitaanermut Naalakkersuisoqarfik utertitsilluni akiilliisoqarnissaanik piumasaaqateqarsinnaavoq, tamatumani:

- 1) Pikkorissartup pikkorissarnini taamaatiinnarpagu, akerlianik uppersarnarneqarsinnaangippat taamaatitsiinnarneq pikkorissartup taassumaluunniit qaniginerpaasaani napparsimasoqarneranik pissuteqartoq.
- 2) Pikkorissartup pikkorissartitsinermi aqqissuussanut amigartumik peqataaniarsimappat uteqqiasumillu kingusinaarluni orniguttarsimappat; pikkorissartup pikkorissaanermi iluamik malinnaasimangippat, taamatullu taamaattoqarneranut naammaginartumik tunngavissaqartoqanngippat.

Imm. 2. Pikkorissartup pikkorissarnini unitsiinnarpagu najugaqarnermi aningaasartuutinut matussusiinissamut tapiissuteqartoqarunnaassaaq piffiup pikkorissarfusup sinnerani. Taamaakkaluartoq, Inuussutissarsiutinut Ilinniartitaanermut Naalakkersuisoqarfup tamanna avaqqussinnaavaa taamaatitsiinnarneq pippat pikkorissartitsinermi qullersaasoq isumaqatigiissuteqarfigereerlugu, ilanngullugit pikkorissartumit imaluunniit taassuma qaniginerpaasanit napparsimaneq pillugu uppersarsaasikkat.

§ 15. Paasineqarpat tapiissutit siunertamut aningaasaliiffigisanit allanut atorneqartut, Inuussutissarsiutinut Ilinniartitaanermut Naalakkersuisoqarfup tapiissutit pineqartut eqqunngitsumik tunngaveqartumik tapiissutisarineqarsimanerat tunngavigalugu pineqartunik tamakkiisumik ilaannakortumilluunniit utertitsilluni akiilisoqarnissaanik piumasaqaateqarsinnaavoq. Taamatuttaaq Inuussutissarsiutinut Ilinniartitaanermut Naalakkersuisoqarfik tapiissuteqarnissamik qinnuteqaatip suliarineqarneranut atatillugu kingusinnerusukkut suliaqarnermini pingaartinnerusinnaavaa tapiissutinik pissarsisup utertitsilluni akiliinissaanik Naalakkersuisoqarfup akilerneqarnissaanik piumasaqaateqarnissaq.

Naammagittaalliorneq

§ 16. Inuussutissarsiutinut Ilinniartitaanermut Naalakkersuisoqarfup tapiissuteqaatit pillugit aalajangersagai, ilanngullugit tapiissutinik tunniussinissamik utertitsillunilu akiliinissat, pisortat aqutsisoqarnikkut oqartussaaffiannut allanut ingerlateqqinneqarsinnaangillat.

Atuutilernera

§ 17. Matumani nalunaarut atuutilerpoq ulloq 1. juli 2008 aallarnerfigalugu. Ilutigalugu, Inuutissarsiutitigut ilinniartitaanermi pikkorissartitsisarnerni tapiissutit pillugit Namminersornerullutik Oqartussat nalunaarutaat nr. 43, 24. oktober 1990-imeersoq atorunnaarpoq.

Namminersornerullutik Oqartussat, ulloq 1. juli 2008

Siverth K. Heilmann

/

Christel Lund Jæger-Hansen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut